

Abeha no solamente ta produci honing, sino ta vital pa bida riba mundo



ORANJESTAD

Recientemente por a tuma nota cu na diferente localidatnan riba nos isla neishinan di abeja ta wordo kibra y abehanan ta wordo mata na cantidadnan grandi, un acto cu e Departamento di Agricultura, Cria y Pesca ta condena.

Abehanan no ta solamente importante pa produccion di honing, sino tambe ta parti valioso di e polonisacion di agricultura y flora.

Cada aña abehanan ta polonisa 90% di mata y plantacionnan rond di mundo y den e forma aki ta genera mas cu 1/3 di alimentonan mundial. Tin mas cu 100 mata cu ta depende completamente riba e polonisacion di abeja pa por produci nan fruta y berduranan. Aki ta trata di matanan manera maishi, concomber,



pampuna y awacati, cual tambe ta wordo planta y cosecha na Aruba.

Estudionan haci door di e Nacionnan Uni a comproba cu sin un accion di biaha pa salba e insectonan aki hopi fruta y berdura no lo existi den futuro. E trabou di e abeja ta uno sumamente importante pa bida riba mundo, mirando cu sin polonisacion matanan lo no produci y ni e ser humano, ni animalnan lo tin alimento pa sobrevivi.

Honing cual e abeja ta produci ta trece cun'e hopi beneficionan pa e salud di e ser humano, manera entre otro ta preveni cancer y problema di curason, ta actua como anti bacteria, ta yuda contra tosamiento y iritacion di garganta, ta regula sucu y ta yuda cura herida.

Santa Rosa como Departamento di Agricultura, Cria y Pesca kier pone enfasis riba e rol grandi cu abehanan ta hunga den e agricultura y flora di Aruba y pa e motibo aki ta pidi pueblo completo colaboracion den e mantenimiento y cuido di e abehanan. Algun luna pasa Santa Rosa a duna inicio na un proyecto di abeja riba nos isla tanto pa

produccion di honing como polonisacion di matanan, pa cual motibo e Departamento a instala un seccion dedica specialmente na Apicultura unda cu ta haci estudio riba e abehanan aki.

Departamento di Agricultura, Cria y Pesca ta trahando riba nivel internacional riba diferente investigacionnan relaciona cu e abehanan riba nos isla y pa e motibo aki e Departamento ta pidi cooperacion di pueblo completo pa cu e estudionan valioso aki. Santa Rosa ta duna servicio na esunnan cu tin molester di neishi di abeja, unda cu esakinan ta wordo colecta y transporta pa Santa Rosa pa sigui cu nan tarea importante di produccion di honing, polonisacion y forma parti di e estudionan cu ta tumando luga.

Pa mas informacion tocante e tarea di Santa Rosa encuanto abeja, of pa meld molester di abeja por tuma contacto na # 585-8102 for di dialuna pa diabierna y durante weekend na 594-6096 unda cu un profesional den Apicultura lo colecta e neishi di abeja cu ta causa molester.

"Ban sostene nos cultura, practica cria, pesca y agricultura." □